

## Inuit pisortanut kiffartuussisut pillugit paasissutissanik nalunaarutiginninneq aamma tamanut saqqummiussineq pillugit Kalaallit Nunaannut nalunaarut

Aningaasanik peqquserluutiniq malunnarunnaarsaasarneq pinerliiniarnernillu aningaasalersuisarneq pinaveersimatinniarlugit iliuuserisassat pillugit inatsip (aningaasanik malunnarunnaarsaasarneq pillugu inatsit) Kalaallit Nunaanni atuutilersinneqarnissaanut peqqussummi nr. 956, 17. maj 2021-meersumi § 18, imm. 9, aamma § 80, imm. 5, peqqussutikkut nr. 2627, 28. december 2021-meersukkut allangortinneqartoq, naapertorlugit aalajangersarneqarpoq:

### *Atuuffia*

**§ 1.** Una nalunaarut suliaqarfinnut §§ 3-10-ni taaneqartunut atuuppoq.

### *Inuit pisortanut kiffartuussisut allattorsimaffiannik tamanut saqqummiussineq*

**§ 2.** Finanstilsyneti Kalaallit Nunaanni inuit pisortanut kiffartuussisut allattorsimaffiannik, atinik, inuutissarsiutiniq aammalu inuunniq paasissutissartalinnik, isumaginnittuuvoq aammalu tamanut saqqummiussisuulluni. Allattorsimaffik Finanstilsyneti nittartagaani saqqummiunneqassaaq. Finanstilsyneti nalunaarutiginninnermik tigusaqarneraniit allattorsimaffik nutarterneqassaaq kingusinnerpaamik ulluinnaat marluk qaangiunneranni, tak. imm. 2.

*Imm. 2.* Suliaqarfiit §§ 3-10-ni taaneqartut inuit aalajangersakkani ilaatinneqartut aqqinik, inuutissarsiutaannik aammalu inuunniq nalunaarutiginnissapput, allattorsimaffimik imm. 1-imi taaneqartumik suliarinninnermini.

*Imm. 3.* Inuk pisortanut kiffartuussisoq Finanstilsyneti allattorsimaffiani allaqqassaaq, inuup taassuma inuutissarsiutiguniuk taanna, inummik taassuminnga pisortanut kiffartuussisut inissisimatitsisoq, tak. peqqussummi § 2, nr. 8. Tamatuma kingorna inummut paasissutissat allattorsimaffimmut immikkoortumut nuunneqassapput, tassanilu inuk allassimasuutigineqassaaq qaammatit 12-it tikillugit, inuup pisortanut kiffartuussisut inissisimanerata atuukkunnaarsimanerata kingornatigut. Allattorsimaffik taanna Finanstilsyneti nittartagaani tamanut saqqummiunneqassaaq.

*Imm. 4.* Nalunaarutiginninnerit EP@ftnet.dk -mut nassiunneqassapput.

### *Inatsisartuniit paasissutissanik nalunaarutiginninneq*

**§ 3.** Inatsisartut Allattoqarfiat inuit tulliuuttumi pineqartut pillugit paasissutissanik nalunaarutiginnissapput:

- 1) Inatsisartunut ilaasortat.
- 2) Sinnisut, Inatsisartunut ilaasortanngortut.
- 3) Inatsisartut Kukkunersuinermit Ataatsimiititaliaata ilaarsortai.

### *Politikkikkut partiiniit paasissutissanik nalunaarutiginninneq*

**§ 4.** Politikkikkut partiit Inatsisartuni sinnisuutitaqartut, partiimi aqutsisunut ilaasortat pillugit paasissutissanik nalunaarutiginnissapput, assersuutigalugu siulersuisuunerit imaluunniit ulluinnarni aqutsisut.

*Imm. 2.* Imm. 1 aamma politikkikkut partiinut Folketingimi sinnisuutitaqartunut atuuppoq.

*Imm. 3.* Politikkikkut partiit, imm. 1-imi imaluunniit imm. 2-mi ilaatinneqartut, taamatuttaaq sinnisut pillugit paasissutissanik nalunaarutiginnissapput, taakkua partiit aqutsisuinut ilaasortanngoraangata, assersuutigalugu siulersuisuunernut imaluunniit ulluinnarni aqutsisunut.

### *Naalakersuisuniit paasissutissanik nalunaarutiginninneq*

**§ 5.** Kalaallit Nunaata naalakkersuisoqarfii tulliuuttumi pineqartut pillugit paasissutissanik nalunaarutiginnissapput:

- 1) Naalakkersuisoq.
- 2) Naalakkersuisoqarfimmi pisortaq.

**§ 6.** Nunanut Allanut Naalakkersuisoqarfik, naalagaaffiup avataaniittuni Kalaallit Nunaata Sinniisoqarfiini pisortat pillugit paasissutissanik nalunaarutiginnissapput.

**§ 7.** Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik Kalaallit Nunaata Radioani (KNR) pisortaaneq aamma siulersuisut pillugit paasissutissanik nalunaarutiginnissapput.

*Pisortat oqartussaqaarfiinit allaniit paasissutissanik nalunaarutiginninneq*

**§ 8.** Pisortat aqutsisoqarfii tulliuuttumi inuit pineqartut pillugit paasissutissanik nalunaarutiginnissapput:

- 1) Pisortaaneq.
- 2) Siulersuisut, siulersuisut aalajangiinissamut piginnaatitaappata.

**§ 9.** Kalaallit Nunaanni Namminersorlutik Oqartussat oqartussaqaarfii pisortat, pisortanut tullersortit aamma siulersuisunut ilaasortat imaluunniit inuit nunat tamalaat akornanni kattuffimmi assingusumik atuuffillit pillugit paasissutissanik nalunaarutiginnissapput, inuk namminersorlutik oqartussat sinnerlugit atorfeqarpat, toqqagaappat imaluunniit inassutigineqarsimappat atuuffiup pineqartup isumaginissaanut.

*Suliffeqaarfinniit, Kalaallit Nunaanni Namminersorlutik Oqartussanit pigineqartuniit, paasissutissanik nalunaarutiginninneq*

**§ 10.** Suliffeqaarfiit, Kalaallit Nunaanni Namminersorlutik Oqartussanit pigineqartut, suliffeqaarfimmi pisornut kiisalu siulersuisunut, nakkutilliisoqarfinnut imaluunniit aqutsisunut assingusunut ilaasortat pillugit paasissutissanik nalunaarutiginnissapput.

*Imm. 2.* Suliffeqaarfik Kalaallit Nunaanni Namminersorlutik Oqartussanit pigineqartoq imatut paasineqassaaq, Kalaallit Nunaanni Namminersorlutik Oqartussat toqqaannartumik imaluunniit toqqaannangitsumik 50 pct.-imik annerusumilluunniit suliffeqaarfiup pigisaatigut pigisaa imaluunniit taasisinnaassutikkut imaluunniit allatigut aalajangiinnaanikkut suliffeqaarfik sunniuteqarfigisaa piginnittuunermik isumaqatigiissutikkut imaluunniit assigisaatigut.

*Imm. 3.* Taamatuttaaq suliffeqaarfiup, Kalaallit Nunaanni Namminersorlutik Oqartussanit pigineqartup, siulersuisunut sinniisuni pillugit paasissutissanik nalunaarutigissaaq, sinniisoq siulersuisunut ilaasortanngorpat, sinniisup ilaasortanngornera, siulersuisunut ilaasortatut qinerneqartup sivirusumik imaluunniit ataavartumik ilaasortaajunnaarneranik pissuteqarpat.

*Nalunaarutiginninnissamut piffissarititaasoq*

**§ 11.** §§ 3-10 malillugit nalunaarutiginninnerit ulluinaat pingasut qaangiutsinnagit pisimassapput, inuk pineqartoq atorfimmik atorfeqalerneraniit, inuup pisortanut kiffartuussisutut inissisimalerneranut kinguneqartumik, tak. peqqussummi § 2, nr. 8.

*Imm. 2.* Taamatuttaaq imm. 1-imi taaneqartutut nalunaarutiginnittoqassaaq, inuk pineqartoq atorfimmit tunuaraangat, inuup pisortanut kiffartuussisutut inissisimalerneranut kinguneqarsimasumiit.

*Inatsisitigut atuutsitsineq*

**§ 12.** Suliaqaarfiit §§ 3-10-ni taaneqartut pisussaaffitik naammassinngippatigut, nalunaarummik uannga kinguneqartut, taava erhvervsministerip pinngitsaaliisutitut ullut ataasiakkaarlugit imaluunniit sapaatip akunnikkaartumik suliaqaarfiit taaneqartut akiligassissinnaavai.

*Atuutilersinneqarnera*

§ 13. Nalunaarut 1. februar 2023-mi atuutilissaaq.